

欽定大清會典事例

欽定大清會典事例卷六百二十七

兵部

綠營處分例

關禁

關禁○順治十一年題准。出口印票。令霸昌道查驗分給。每季將人數造冊報部。○十三年題准。

盛京貿易民人。府州縣給發印票。出山海關之外。藩蒙古人員。理藩院咨部取票給發。○十五年題准。旗人出關。該都統咨部給票。採木人。工部咨部給票。○十八年題准。宗室差人往候外藩。

公主及結婚等事。由禮部題明咨部給票。○康熙元年題准。各關口出入人等。須按名驗票。查對年貌籍貫。註冊放行。將出口人數花名造冊。按季送部察數。○又題准。王府屬下人至民人等。有願出古北口燒炭者。由部給發印票。○又題准。給票出關採伐材木者。限一年繳換。砍柴燒炭者。限六月繳換。逾限者送工部察議。○又題准。凡願往古北口石塘路潮河川牆子路南冶口二道關外砍柴燒炭者。據工部咨文給票。○十一年題准。私給外國接壤邊口印票者革

職拏問。其餘邊口私給印票者革職。○十八年題准。潘家口。桃林口。聽旗民採木外。其潮河川。牆子路。南冶口。二道關等處。有願往採伐材木者。將人畜數目呈報工部。咨部給票。亦准出口。○十九年題准。願出龍井口採木者。亦照例給發關票。○三十年題准。直隸省各州縣。若有往盛京貿易者。各該府州縣官問明於某年月日去。某年月日回。開明印文。給予本人。令其貿易。行令山海關守門滿漢各官查驗該府州縣印文。放出。如無印文。不准出關。若有違限月日。亦不

准貿易。即行逐回。○三十三年題准。商人出董家口鐵門關採木。亦准給票。○三十四年覆准。內地民人。不許在邊外居住。如有私出邊外居住者。查出將守口旗員。一併嚴加治罪。○四十年

諭。近來蒙古賊盜盡息。沿邊地方百姓。如有偷盜口外蒙古牲畜者。著交與兵部行文沿邊地方各官。嚴行禁止。若百姓仍照前偷竊。發覺之時。將地方各官一併從重治罪。○又覆准。凡砍木燒炭之人。工部咨部給票。定以限期。採木者限一年繳換。燒炭者限

六月繳換。每人由部給小票一張。以備口外盤查。又造人數年貌清冊。發守關口官逐名點驗。守關口官仍令票頭將部給小票。並年貌冊內均挂明字號。始行放出。限滿進口。仍令票頭將所領之人率齊到口。該守關口官照冊驗票相符。按名銷號。然後放入。票內之人。如有逃盜罪坐票頭。在外病故者。准票頭稟明守關口官存案。其詐稱病故者。事發將票頭一併從重治罪。守關口官不行詳查。有混冒放出。及遺留在外之匪類。不行查拏者。降一級調用。加級紀錄。不

准抵銷。如口外莊頭恃勢容留匪類。事發治罪。
○五十一年覆准。

盛京黑龍江等處官兵。及閒散來京人等。均令由
山海關行走。進口時詳記人數姓名。回時仍照
原進口所記之名查對放行外。其

盛京吉林黑龍江各處人等。有來京買人者。具呈
該將軍衙門。該將軍給以咨部印文。准其買人。
出關時仍令山海關總管等。將從京城買去之
人數詳查報部。如有拐騙別故。即拏送該部察
議。若無別故。或係印文所買。或係白契所買。男

婦每名納稅銀五兩。幼童幼女每名納稅銀三兩。將納稅人數確驗明白。移咨該將軍照咨逐一詳加查詢。如有誑騙誘買別故。將人一併解送刑部嚴審具題。將軍等所屬地方。有買人賣人者。亦皆查詢明白。收稅准買。收過稅銀數目。年終彙報該部。交與

盛京戶部察數。有自京城往

盛京黑龍江等處者。仍照例起票。至山海關令總

管後政副都統驗票。詢明所往。別給咨文。仍令各該

處地方官驗文呈報。如數目外錯。送部察議。自

京領票出山海關人等。回時令山海關總管仍照出口數目查明放入。數目舛錯者亦令報部察議。再往吉林黑龍江去者。由喜峯口冷口亦可行走。凡所買之人不准出此二口。如有誑騙之人。設法攜帶出口。嚴責各該衙門管轄番役旗員等不時查拏。○又覆准古北口至山海關除堵塞關口外。現存外九門邊口。凡買去之人不准放行。令該部行文嚴行禁止。山海關行走旗人甚多。侍衛官員前鋒護軍當差馬甲人等往

盛京吉林黑龍江等處。上祖父墳塋探親戚取家眷人等。或有將誘買之人買去。雖入役從內帶至彼處轉賣者。亦未可定。嗣後八旗官兵及閒散人等前往。

盛京吉林黑龍江等處所屬地方者。係侍衛令領侍衛內大臣將役從人等逐一驗明。令其領取部票前往。係前鋒護軍令前鋒統領護軍統領驗明。係驍騎校領催馬甲閒散人等。令都統副都統逐一驗明。令其領取部票前往。如有將此等人隱漏多行夾帶者。各該管大臣題參。交部

治罪。○雍正二年覆准。採辦官用木植。該撫將所屬採木商人給以執照。開明何項應用數目若干。知照守關口官存票備案。○四年覆准。旗人商民有進威遠堡法庫等處邊口者。呈明該管官給予印照。管關口官驗照放行。如給照驗照之官。稽遲勒索者。皆降二級調用。需索財物及賄縱無照人進口者。皆革職提問。若所屬人等勒索財物。照衙役犯贓例議處。至無照人私行進口。守關口官不查拏者。降一級調用。加級紀錄。不准抵銷。○五年議准。出兵種地生臺人

員如遣人進京。呈明該將軍並管理種地驛站官給發印照。守關口官驗照註冊。令其進口。按季造冊報部。如無印照。拏解刑部治罪。儻不實力稽察。聽其入口。守關口官降一級調用。加級紀錄。不准抵銷。○又覆准。奉天吉林黑龍江山海關及凡有邊口地方。每年將出口人數按季造冊申報。取具並無匪類出口印甘各結。儻守關口官不驗明印票。及受賄任其蒙混出入。經該管官查出。即行詳報該將軍督撫提鎮題。叅交刑部嚴加治罪。若該將軍督撫提鎮通同徇

庇不嚴查。參處以致匪類越境生事。發覺日皆照徇庇失察例。分別議處。乾隆七年議准。關口鎖鑰責成旗員專管。若將無票私出之人不行查拏。該守關口官降一級調用。加級紀錄。不准抵銷。關口直班兵丁鞭八十。無票之人冒入別夥出口。或潛行偷越。及私帶人出口者。皆鞭一百。若放出私販人口者。守關口官革職。兵丁加一等治罪。受賄縱放者。守關口官革職。計贓以枉法論。兵丁以衙役枉法犯贓論。從重治罪。皆遇

赦不宥。○又議准。奉天等處與朝鮮接壤地方。如有在朝鮮境界漁採。或沿海蓋房居住。及無票出口越境生事者。該地方防守官弁。明知故縱。不行查拏。該管城守尉等官。揭報該將軍題。叅將防守官弁革職提問。僮通同徇庇。不行揭報。題叅者。該管城守尉等官。降三級調用。該將軍副都統。降二級調用。若係私行越渡。該地方防守官弁。失於覺察。拏獲之日。審明由何處出口。將該處防守官弁。降四級調用。該管城守尉等官。降一級調用。該將軍副都統。罰俸一年。○又議

准。山東省民人往奉天傭工者。該州縣詢明姓名年貌籍貫。給予印票前往。守關口官查對印票年貌相符。准其出口。同時該地方官於原領票內鈐印。令其帶回本地方察覈。如傭工人等無印票。或與票內年貌不符。及兵役人等刁難勒索者。守關口官自行察出免議。如有疏縱等情。降二級調用。○九年奏准。

興京開原遼陽三城。該將軍委協領一人前往巡察。鳳凰城邊門。熊岳副都統委協領一人巡察。盛京近海之牛莊。蓋州。熊岳。全州。旅順。岫巖。鳳凰。

城等處該將軍三年巡察一次。十年議准。官商有私立小票。遠接剽採私濫之人。至甯古塔貨賣。巡察官未經拏獲者。降三級調用。知情故縱者革職。給票官亦照此例議處。十四年議准。察哈爾八旗牧廠等處官兵。容留無票民人者。查出照容隱例議處。係官降二級調用。兵鞭九十。鄰近蒙古知而不首者。亦照此例處分。至看守官兵。出具並無無票民人私行煎鹼剽掘物件甘結。該總管鈐印轉報後。有別經發覺者。看守官降二級調用。兵鞭九十。轉報之總管罰

俸一年。如總管等自行察出拏獲者免議。○又議准。察哈爾總管委出官兵。移紮產鹼地方。隨時巡察。其牛羊羣捕盜官兵。仍令訪緝牧廠盜賊。該總管等各按所轄地方。每年酌定親往稽察。遇有游民竊馬盜鹼等事。將看守官兵照窩隱逃人例議處。總管等失察。別經發覺者。照約束不嚴例降一級調用。○二十七年

諭奉天直隸海船往來運販米豆雜糧。向有例禁。今夏近京一帶雨水過多。市價未免稍昂。而奉屬連年豐稔。若令商販流通。於小民生計甚有裨益。著暫開海

禁一年。俟明歲秋收後。再行停止。至商販船隻出入。應行驗票稽查。其由京往奉省者。令於步軍統領衙門給票。由奉省來京者。於奉天將軍衙門給票。庶彼此察覈有憑。可杜冒濫諸弊。○二十九年奏准。直隸省宣化鎮屬之東柵口。西柵口。鎮嶺口。青平塘子。盤道口。四望。甄墩。新鎮。樓野。雞山。門樓口。安邊墩。靜樓墩。鎮衝臺。盤道臺。鳳凰臺。鎮宜臺。鎮水臺。水關臺。鎮口臺。小水口。四海營。盤鎮。河臺口。古北口。提督所屬之遵化口。喜峯口。潘家口。義院口。大毛山。黃土嶺等關口。如有民人出入。

樵採糶糶耕種傭工者。呈明該州縣每年給予印票一次。將年貌姓名造冊移交該口官弁。按冊驗票。年貌姓名相符。准其出入。該州縣將給過印票。守口官將放過人數。於歲底彙造清冊。呈報兵部查覈。如無州縣印票。或票與冊內所開年貌姓名不符。概不許其出入。又山西各隘口。如有遠去民人。取有張家口同知。或本籍地方官印票。及種地莊頭帶有綏遠城將軍。及右衛城守尉滿漢木牌。方許出入。其近邊民人。出入採捕糶糶傭工耕種之人。取有鄉地保結。並

連名互結。開明年貌丁口。註定檔案。交守口弁
兵按檔驗明。准其出入。三十五年奏准。五臺
等處喇嘛前往普陀進香者。由該督撫咨明理
藩院轉咨兵部給發路引。該管督撫轉咨浙省。
飭令守口官弁查驗放行。回權後。守口官弁驗
明放進。呈報浙江巡撫。於年終將出入人數。造
具清冊。分送兵部並理藩院查覈。如出口人數。
與部發路引不符。將守口官弁照盤查不實例。
議處。三十九年奏准。蒙古民人自外入口。帶
有無鞏馬駝成羣牛羊。執有照票保結。守口官

弁驗明註冊放行。於歲底造具冊結送部查覈。若無票結放入者。照失察無票民人出口例議處。如縱令兵役留難阻抑。照關津留難律議處。需索受財者。計贓以枉法論。至偷盜馬駝牛羊進口。查係雇與商民騎載。實有檔案可憑者免議。○又奏准。各處逃遣匪徒等犯。無照偷越威遠保等處邊柵者。將巡查邊柵之武職降一級調用。如係偷越邊門。將稽察邊柵之武職罰俸一年。○又奏准。

盛京吉林黑龍江等處官兵閒散人等來京。該地

方大臣官員給予印票。守關口官查驗放行。如有來京買人者。填明男女口數。具呈該將軍等咨報兵部。准其買人。所買之人。仍報明兵部查數。與原咨數目相符。准其帶回。於口票內填明。並咨覆該將軍。俱從山海關行走。別口不准放行。仍由部行文該副都統照數確查。如有拐騙別故。拏送刑部治罪。在京八旗官兵閒散人等。前往

盛京吉林黑龍江等處。俱著該管大臣將伊等跟役逐一查明。移咨兵部給票。如將誘買之人。雜

入跟役數內。帶至彼處轉賣。各該管大臣題參。交部治罪。自京領票至山海關。該副都統驗票放行。仍移咨出關之人所往地方。令該處地方官據咨查明。呈報該將軍查覈。同時該副都統查照出關人數放入。如有舛錯。報明兵部。移送刑部訊明情由治罪。其該管關口官不實力稽查。致有拐賣出口情弊。即將該管關口官照放出私販人口姦棍例議處。又奏准甘肅嘉峪關。每日辰開酉閉。將進關之人盤詰放行。如有情願出關墾種民人。呈明地方官給予照票。守

口員弁驗明年貌方准其出口。失察盜犯逃犯偷渡邊口。一名守口官罰俸一年。二名降一級留任。三名降一級調用。五名以上降三級調用。十名以上革職。失察無票民人偷渡邊口。一二名守口官罰俸一年。三名以上降一級留任。五名以上降一級調用。十名以上降三級調用。放出私販人口者革職。受賄放出者革職治罪。出口之人帶有印票。該管官不即驗票放行。稽遲措勒者降二級調用。至驗票兵丁有需索等弊者。該管官照衙役犯贓例議處。十兩以上者降

一級留任。十兩以下者罰俸一年。如有夾帶違禁貨物。守口官徇縱令其出口者。按其所帶之物。分別治罪。○又奏准甯夏所屬關津甚多。每年秋季派副都統一員。於九月中帶兵四百名巡查。○四十二年奏准外省民人寄居滇境沿邊各處。在在可以出入。惟滇省永昌有路江一處。順甯有緬甯一處。皆為通達各邊總匯之區。應特派員升專司稽察。遇有江楚客民。即驅令歸回。其向來居住近邊之人。如有進關回籍等事。俱用互結報明。官給印票。關口驗明放行。回

滇時仍驗票放行。若無印票。即屬新來之人。概不准以探親覓友等故。藉詞出外。如各員弁混放偷漏。查明叅處。又

諭。伊犁烏魯木齊。均係新疆地方。距哈薩克布魯特邊界甚近。此項化緣喇嘛。行同乞丐。如今伊等任意在新疆各處行走。偶出卡倫邊界。流入哈薩克布魯特地方。殊多關礙。非但不宜令往哈薩克布魯特地方。即喀爾喀地方與俄羅斯境界相通。亦不可令其前往。嗣後如有內地喇嘛。及實在商人出境。駐紮該處。大臣等查明。准其換給路引遣往。若化緣游方行丐。

之喇嘛等。務須嚴查。實力禁止。毋令出口。○四十九年奏准。雲南省臨安開化二府所屬土司。均通外境。於要隘處所設立關口。專派員弁駐紮巡查。如有疏漏一名者。守口官罰俸一年。二名降一級留任。三名降一級調用。五名以上降三級調用。十名以上革職。○又奏准。邊地汎渡弁兵。將貿易割草之人。於去時登記人數。回時若人數短少。即行文蒙古查拏。若弁兵不隨時稽察。致發遣人犯混入貿易割草人中。逃入蒙古境內者。將汎渡員弁降一級調用。兵丁鞭八十。○

又奏准。廣西省南甯太平鎮安三府漢土各屬。

路通安南

今名越南

之處。其有內地民人潛越出外

開礦者。押回原籍。照律治罪。若兵丁擅離汛地。

互相推諉者。責革。賄縱者。追贓治罪。沿邊各官

稽察不力。以致民人出口潛越安南者。專汛官

降二級調用。兼轄同城者。降一級調用。不同城

者。降一級留任。統轄將領降一級。照舊辦事。賄

縱者。革職。計贓治罪。如往安南開礦之人。經由

全州賓州南甯等處。該地方專汛官不行查拏

者。各降一級留任。○又奏准。內地喇嘛並商人

載貨在歸化城請票出口者。令該同知驗明申報歸化城副都統就近查覈給發路票。其由張家口行走者。令張家口同知驗明申報察哈爾都統就近查覈給票放行。至游方喇嘛以及孤身蒙古民人嚴行查禁。不許擅給路票。令其出口。如不行詳查擅給路票者。將該都統副都統罰俸六月。○又奏准凡口外游牧居住之公主格格等請

安及他事差令太監進口者。呈明札薩克給予印文。京城居住之公主格格等遇

聖駕在熱河。差令太監前往請

安。及他事出口者。報知理藩院轉咨兵部給予口票。

王公等福晉妻室差太監前往熱河請

安者。呈報該旗轉咨兵部給票。○五十七年

諭。直隸省今年京南各屬被旱較廣。地方官散賑。恐有

未周。若不設法辦理。則京城熱河就食者。日聚日衆。

古語救荒無善策。現詢據熱河道府等稱。熱河領賑

貧民。有每日赴廠食粥者。有領過一二次不復再來

者。該道府訪詢情形。此等領賑貧民。並非俱藉粥賑

度活。其稍有力者。即分赴他處手藝傭工。各自謀生

等語。可見領賑貧民內。稍資接濟。原即有可以自謀生計之人。並非一律嗷嗷待哺。專資粥賑度日。除已令熱河道府就近曉諭各貧民。由張三營博洛河屯等處分往各蒙古地方謀食者不禁。其京南地方亦應一體妥辦。著梁肯堂即轉飭各州縣。於赴京出口通衢。令各地方官。遇有貧民。詳悉曉諭。今年關東盛京及土默特喀喇沁教漢八溝三座塔一帶。均屬豐收。爾等何不各赴豐稔地方傭工覓食。俟本處麥收有望。即可速回鄉里。如此徧行曉諭。並令其或出山海關赴盛京一帶。或出張家口喜峯口赴八溝三座

塔暨蒙古地方。不必專由古北口出口。則貧民中稍可力圖自給者。知有長遠覓食之路。自必分投謀生。不至齊赴粥廠。致滋擁擠。人多致病。庶更妥協。但總須善為開導。不可加之攔阻。此事該督既貽誤於前。再不實力稽查。任令地方官吏剋扣浮冒。其咎已不止於革職留任。若復將赴賑貧民阻其生路。則其咎更重。斷不能稍為寬貸也。將此傳諭知之。五十八

年

諭嗣後各處關隘。務須督飭該管各員小心彈壓。嚴密稽查。如有脫逃遣犯私行進口者。即將疏防員弁查

明叅奏。以示懲儆。○嘉慶六年奏准。八旗官兵告假。前往外省。應給路引口票者。由該都統出具印文。咨報兵部。叵明給予。現任文職官員告假。前往外省者。由該衙門咨明吏部。轉咨兵部。給予路引。均於文到之日。兵部始行給發引票。如兵丁閒散人等。告假前往外省。承辦官不行報部。請給路引。私給關防牌票。令其前往者。承辦官罰俸三月。○又奏准。漢官請領口票路引。如係現任京職。由該員本衙門叵明。移咨兵部。辦給。如係候補候選人員。並非現任京職者。取具六

品以上同鄉京官印結。呈明兵部辦給。○又奏准。旗員補放綠營。如有子弟告假省親。在本旗具呈給假。並未請領路引。私赴任所。父兄不呈明解京。一經查出。無論時之久暫。將伊父兄均降三級調用。○又奏准。武職守口官員。如不實力稽查。致有逃走。太監偷越出口者。每名降一級留任。○八年奉

旨。向來各關口。遇有民人出入。其是否憑票驗放。自有定章程。茲據密雲副都統永懋奏稱。古北口一處。出入商民。及載貨車輛。向止檢查行李。驗係平民。即

便放行。並無驗票之例。所奏自係相沿舊例。但關隘
職任稽查。現在山海關於經過民人。即係憑票驗放。
何以古北口一處。獨無驗票之例。辦理殊未盡一。所
有永慈原摺著交部。俟各關口奏到時。如何酌定章
程查覈之處。一併詳晰妥議具奏。○又奏准。嗣後各
關口民人出入。凡隻身前往者。無論貿易傭工
及就食窮民。皆令呈明該地方官給票。到關查
驗放行。原票令該民人自持。以憑進關時查照。
其貿易民人。如在原籍貿易者。即由原籍領票。
如在他處貿易者。即由該貿易地方領票。不得

一概向近關口之地方官請領。所有放過票張，仍令造冊報部。並令守口員弁將驗票放行者，照例冊報外，仍將並無放過無票出口民人之處，按季加結呈報，以備查覈。至山海關以外，係東三省地方，為滿洲根本重地，遇有攜帶眷屬及出口就食民人，其中恐不免有圖利民人私往開墾，於東三省旗人生計大有關係，應將攜眷民人出口之處，永行禁止。其所屬之喜峯口冷口，亦一體嚴禁。設關內地方偶值荒歉，應由該督撫察看災分輕重，人數多寡，酌量情形，據

實具奏。俟奉

旨允行。方准出關。並令守口員弁及附近州縣。將人數記檔。仍於本年成熟之後。由

盛京等處將軍。出示曉諭。勸令回籍安業。不得任聽久住。以杜私墾等弊。再

盛京復州海城。蓋平甯海等縣。與山東登萊青等府隔海對岸。若民人攜眷乘船徑渡。甚屬便捷。今山海關既經禁止。攜眷出關。所有山東沿海地方。亦應飭令一體加意嚴查。其熱河承德府所屬朝陽建昌等縣。與

盛京錦州義州接壤地方邊關。尤應通飭查禁。庶稽察更為周密。至古北口以外。灤平豐甯二縣向係土著民人。按冊輸糧。由來已久。若將攜眷出口者概行禁止。於蒙古民人均有未便。可令該民人呈明原籍。給票放行。無票照者。即行阻止。其餘張家口獨石口二處。關外數十里。即係壩上草地。又羅文峪關外。山路難行。並無攜眷出口百姓。亦應隨時嚴查。總不得任聽無票放行。致違定例。至該處出口貿易商民。應照山海關之例。或由原籍。或由貿易處所。給票驗放。其

近口民人逐日出入亦應令該地方每年給予印票一次常川照驗嗣後沿邊各關口如有並不驗票放行者該都統副都統將守口官叅奏照失察無票民人出口之例按其所故名數分別議處奉

旨。山海關外係東三省地方。為滿洲根本重地。不准流寓民人雜處其間。私墾地畝。致礙旗人生計。例禁有年。乾隆五十七年。京南偶被偏災。准無業貧民出口覓食。係屬一時權宜撫綏之計。事後即應停止。乃近年以來。民人多有攜眷出關。並不分別稽察驗票。概

准放行。即因嘉慶六年秋間畿南被水成災。間有窮黎攜眷出口之事。迨至上年直隸收成豐稔。民氣已復。何以直至今春。尚有攜眷出關數百餘戶。嗣後民人出入。除隻身貿易傭工就食貧民。仍令呈明地方官給票。到關查驗放行。造冊報部外。其攜眷出口之戶。概行禁止。即遇關內地方偶值荒歉之年。貧民亟思移家謀食。情願出口營生者。亦應由地方官察看災分輕重。人數多寡。報明督撫據實陳奏。候旨允行。後始准出關。仍當明定期限。飭令遵限停止。毋得日久因循。致滋弊端。此次立定章程以後。並著直隸山

東各督撫接到部咨。徧行出示曉諭。飭禁民人攜眷出口。該民人等當各在本籍安業謀生。不得輕去其鄉。希圖出口謀食。相率赴關。以致半途而返。庶民人知干例禁。不至徒勞跋涉也。○又覆准。

盛京一帶地方為

國家根本重地。旗人生計攸關。不但攜眷出口民人。不便令其紛紛雜處。侵占田地。即隻身傭工民人出關。務令在原籍州縣起票。始准驗放。至商賈民人。令在原籍及貿易所在地方隨處起票。近關州縣。實係販易所在。亦准給票驗放。不

得專向臨榆一縣起票。關內關外數十里以內居民等。有係姻親眷屬。彼此往來探望者。在本州縣出具文結。報明關口。定限進出日期。以杜冒混。至進關民人。無論有無票據。概准放行。惟當嚴密稽查。不致東三省脫逃遣犯。得以混入。並私帶違例之物入關。向來出關原票。令本人收執。以備進關查驗。今既准無票進關。恐民人等將出關原票藏匿帶進。轉給他人。影射出關。嗣後出關原票。驗明後存留關上。以杜假冒。又喜峯口冷口等處出口民人。照出入樵採雜糶。

之例。令其呈明附近地方官。每年給予印票一
次。常川照驗。○又

諭前因山海關地方。多有內地民人攜眷出口。經兵部
議定章程具奏。當即降旨飭令直隸山東各督撫出
示曉諭居民。明定限期。禁止出口。近聞內地民人前
往山海關守候出關者。尚復不少。貧民亟思移家謀
食。相率赴關。係在未經定限以前。若令仍回原籍領
票。該民人等力有不能。如任其擁擠關口。概不放行。
則日聚日多。成何事體。著策拔克即馳驛前赴山海
關。會同來儀查點欲行出口之戶。現有若干。逐一放

行。仍著直隸山東各督撫再行定限。出示曉諭。該民人等自此次定限之後。斷不得攜眷出口。致干例禁。仍各將如何出示定限緣由。先行具奏。○又奉

旨。兵部議駁來儀具奏出關民人就近給票一摺。所駁甚是。商民出口既定有章程。各州縣早經出示曉諭。凡領有照票者。到關驗放。若無票據。不准放行。該商民等自應一體懍遵。乃該關前有載鐵鍋車九輛。車夫九名。行至關口。並無商人持票呈驗。商人以販貨為生。豈有將貨車盡委之車夫。並不跟隨同行之理。乃來儀奏稱將來如有載貨車輛。車夫未在原籍起

票。商人亦未持票到關者。俱請由臨榆縣發給照票。驗放。此端一開。各商民必致仍前混冒出口。與不起票何異。明係該關兵役受賄私放。來儀聽其慫恿。並未根究。商人實在下落。率即放令出關。殊屬不合。著傳旨申飭。嗣後凡商民出關。仍須遵照奏定章程。或在原籍。或在貿易處所。起票驗放。即攬載車夫。亦應將其年貌姓名。同商人總一票。以憑查覈放行。毋得再任其冒干例禁。致滋弊混。○又

諭。策拔克來儀奏查閱攜眷出關民人各情形一摺。據稱六月初間。有攜眷出口民人十戶。計三十七名口。

因到關方知新例。均紛紛回籍。此外有貿易民人百有餘人。未經本籍給票。經來儀照舊放行。又策拔克到後。適有出口民人五戶。計十六名口。因不知新例。不准出關。亦經策拔克等給票放行等語。所辨尚是。各關口禁止民人等攜眷出口。前經兵部於五月初間奏定章程。朕特降諭旨。令直隸山東各督撫等。徧行曉諭。原欲使民人早知例禁。不致紛紛冒昧赴關。復被阻止。徒勞往返跋涉。此事已閱兩月。何以民人等尚未知悉。試思小民居家乏食。至遠涉數千里。覓地傭工。其窮苦已可概見。因格於新例。到關後不能

放行。復須回歸本籍。往來跋涉。徒費盤纏。豈不倍形拮据。若不早為禁止。大張示諭。實無以體恤貧民。著再傳諭直隸山東各督撫等。於接奉此旨後。迅即將現定章程。速行宣布。俾小民等共見共聞。家喻戶曉。自不致冒干例禁。該督撫等於出示曉諭後。即一面知會來儀。互相照察。庶無歧誤。再此次小民等因不知新例。紛紛到關。經朕施恩准放。但恐此外各處愚民聞知。不持票引。仍可出關。未免心存希冀。相率前來。不可不明示限期。著定以本年十月初一日為限。除限內到關者仍准放行外。如限外到關者。並無票

據。即當遵例停止。毋許擅放。十年。

諭。昨據富俊奏部議。乞濩劄夫。每票一人。礙難辦理。請酌添每票五人一摺。已降旨姑允所請。即責成富俊試辦一年。再行具奏矣。因思此項劄夫。既已按票增添。所交濩數。自較舊額有加。當命軍機大臣向富俊詢問。據稱從前每票一人。交濩五錢。此後每票五人。仍係交濩五錢。緣劄夫出口。乞濩攜帶衣履。及料理炊爨等事。非一人所能兼顧。舊例每票一人。其中私自夾帶者。實不止此數。是以奏明酌定五人。製給腰牌。可按數而稽。免致私行偷越。惟摺內未將照舊交

漫五錢之處。明晰聲敘。著交部議處。並請嗣後仍以每票一人交漫五錢。每一人票後。准其帶炊爨人四名出邊等語。劄夫出口空漫。一切炊爨等事。需人幫同照料。自係實在情形。著仍定為每票一人。准其攜帶炊爨人四名出邊。即由該將軍給予腰牌。嚴飭各卡倫官兵查驗出入。自此次酌增人數之後。儻再有影射夾帶。或復私行增添。即惟富俊是問。毋自蹈疏縱欺飾之咎也。○十五年議定。秧漫之弊。責成該將軍副都統。並奉天府尹。令該地方文武官弁。不時嚴密稽查。具結呈報。後將軍副都統府尹文

武員弁分投往查。如有偷種等弊。即將各該地方官實降三級調用。知情縱容者革職治罪。稽查之員未經查出。與夫察之地方官一體降調。如有瞻徇容隱等情。並叅革治罪。該將軍副都統府尹自行查出。免其處分。儻被別人告發。降三級留任。官漫到局後。先令局員認看。儻有秧淺攙雜。係何界何人所交。即將該地方官稟明將軍等叅處。稽查官亦如之。將軍副都統府尹及

欽派侍郎降三級調用。○又議定。偷漏私漫。多由海

口前往山東登州府銷售。應令該將軍會同府尹每年遴派委員。輪往查拏。並責成該地方官於商賈上船之時。查驗蹤迹。留心盤詰。如在登州海口盤獲私漫。訊明由奉天何處海口上船。即將巡察官並該地方官一併叅處。○又

諭。每年奉天巡察海口。僅由將軍府尹派員前往。恐仍不免疏漏。著將軍奏明。請派盛京侍郎一員。帶領協領一二員。前往緝拏。如拏獲私漫。即著該侍郎具奏。將漫斤解京。並將該侍郎及協領等一併議敘。其山東海口。專令登州總兵巡緝。亦尚未周。著添派登萊

青道會同稽察。如拏獲私漫上岸。即報明山東巡撫具奏。漫斤解京。將該鎮道議敘。並將派查盛京侍郎協領等官一併議處。○又奏准。直省城門及各府州縣城門鎖鑰。均歸城守武職掌管。務須督率兵丁。按例以時啟閉。稽查出入。儻有任意遲留。放人出入者。該管城守官罰俸一年。若將鎖鑰不親自收管。任聽兵丁私行開門。放姦匪出入者。將專管官降二級調用。○十七年

諭。御史陳超曾奏請飭各關監督及總理兼理關務各員。慎選家人書吏。並隨時嚴行約束一摺。各省關口

徵收稅課。勢不能不派家丁書吏代為經營。該丁役等有誠實謹守者。或不敢作姦犯科。若貪詐之徒。用度侈靡。則虧缺侵隱之弊。相因而起。近年各省關稅。每多短絀。未必不由於此。嗣後各直省有經徵關稅之責者。務宜選擇誠實家丁書吏。分派經營。並不時查察。嚴行約束。其狡偽侵欺者。即隨案懲辦。庶權務肅清。自於公帑有裨。○十九年

諭。昨經降旨。以乾隆五十六年。陝西地方有盤獲八卦教邪匪劉照魁。赴喀什噶爾代王子重傳信滋事之案。通諭新疆辦事大臣。將上年逆案遺犯。加意管束。

有犯必誅。茲查劉照魁當日由陝西解部審訊之時。詰以如何出口。據稱係在肅州地方。假認王子重親戚。前往探望。到肅州衙門起票出口。沿途得以照驗無阻等語。當經

皇考高宗純皇帝特頒諭旨。查明管關給票及沿途不行查驗之員。嚴行懲創在案。現在逆案內發遣人犯較之當日王子重之僅習邪教者。情罪尤重。豈得任其親屬人等私相往來。藉探望為名。致滋事端。著傳諭陝甘總督嚴飭該管肅州認真查察。毋得輕給口票。其嘉峪關以外。南北兩路。並著各該處辦事大臣。

認真查驗。如有假冒隱混起票出口者。立即嚴拏審辦。儻有疏縱情事。一併懲處不貸。○道光四年

諭。那彥成等奏。蒙古喇嘛出口請酌定章程一摺。青海地方。自上年驅逐野番後。恐有漢姦私販糧茶。經該督等奏定章程。沿邊各營卡。嚴禁無票之人。不准出口。惟北口各部落。蒙古喇嘛十人以下無票赴藏熬茶者甚多。若概令由原處請票。非所以示體恤。然現當立法嚴禁之時。亦未可令無票之人。任意出入。著照所請。嗣後凡有北口各部落。蒙古喇嘛赴藏熬茶。十人以上者。仍由原處請票。十人以下無票出口者。

由西甯何處營卡行走。即責令該營卡官弁詳細查驗人畜包物數目。報明青海衙門覈給執照。一面移咨駐藏大臣查照。將票繳銷。同時由駐藏大臣發給路票。在青海衙門查銷。以免煩擾而昭慎密。○十二

年

諭據祁墳奏探明越南諒山鎮地方。改設巡撫。因管轄七州。操演兵丁。係循照舊例。該國貿易客商。年終按戶取銀二兩。今加倍收銀四兩。貼補新兵口糧。並非屯糧。至高平新開道路。設立塘卡。為稽查盜匪遞送公文起見。其另有通諒山鎮大路。令兵丁鑿剔荆榛。

因貢使將次回國。該國金銀廠仍行開採。照常抽課。業飭左江鎮文哲琿馳赴鎮南關。查看邊牆堅固。居民安堵。委無別項情事。各等語。越南素稱恭順。現據該撫查明。該國設立巡撫等事。係為自行整飭地方起見。實無他意。惟邊防要地。必當加意防閑。認真查察。不得有懈。周巡切毋稍涉張皇。使彼轉生疑惑。尤須嚴禁內地匪徒。及一切游民。潛出關外。別滋事端。著李鴻賓等督飭派守各官兵。實力稽察。嚴密守禦。並著祁墳蘇兆熊就近明查暗訪。隨時防範。以重邊防。○咸豐三年

諭御史蕭時韻奏請嚴禁私販硝磺等語。硝磺私販售賣。例禁甚嚴。全在該地方官嚴密稽查。庶免偷漏滋弊。現當各省辦理團練之時。尤應加意嚴防。上年江蘇拏獲豐縣差役等。與販私硝至二十五萬數千斤之多。此外破獲之案。甚屬寥寥。即如本年署山西巡撫哈芬行至平定州屬。飭令查拏私硝。該州錫齡竟敢飾詞推諉。可見各該地方官。因循疲玩。積習相沿。以致姦販肆行。毫無忌憚。殊堪痛恨。著各該督撫等。嚴飭地方文武員弁。各於隘口認真巡查。儻有私販拏獲。從重懲辦。毋得視為具文。致干重咎。○九年

諭。勝保翁同書奏請飭各路統兵大臣及各省督撫嚴禁偷販私礦等語。據稱參將李世忠詳稟。逆匪橫行。皆由私礦接濟。並指出大江南北水陸口岸各要隘。姦商通匪偷販各情。亟應嚴行查禁。以杜私售。惟現在用兵地方。袤延數省。隘口過多。私礦販運之處。斷絕非易。其各省會及著名鎮市商賈輻輳之所。尤應詳加盤詰。除山西等處產礦之地。嚴禁私礦出售外。其各路軍營及用兵省分。非有統兵大臣及該督撫委員解送印文知照者。概不准擅行採買。其經過關津隘卡。如無印文護票者。即著查拏懲辦。倘有不肖

官吏私行賄放者。查出嚴行治罪。軍營兵勇。如有偷漏硝磺火藥接濟賊營者。即以軍法從事。著官文德興阿和春勝保曾國藩張芾傅振邦等。及各直省督撫。嚴定章程。實力盤禁。毋稍鬆懈。至所呈該參將原稟。太平關無為州等處。粵逆日收稅銀。為數甚鉅。並著和春何桂清等。嚴飭地方員弁。於東壩一帶。曉諭商民。不准在太平關等處販賣貨物。使該逆收稅日少。無從接濟米糧。以冀制賊死命。○同治四年

諭。山海關地方緊要。恐有盜匪出入。著長善督飭弁兵。將各處隘口。實力巡防。遇有成羣結隊。形迹可疑之

人。即行拏辦。不准虛應故事。○又

諭崇厚奏選派馬步官兵馳赴荊州一帶會捕馬賊。長善奏賊匪突竄入口。請將驍騎校等官議處。文謙奏賊由遵荊東竄情形。順天府奏訪得賊匪居址姓名。請飭飛速掩捕各等語。馬賊聚眾多人。突入喜峯口。肆擾遵化荊州寶坻一帶。復行東竄出關。經過州縣地方。任賊橫行。毫無阻遏。雖有官兵追捕。未受懲創。若不認真堵遏。任賊肆意出沒。其患何所底止。劉長佑身任封圻。責無旁貸。著懍遵疊次諭旨。迅派兵弁會同順天府所屬地方文武員弁。合力勒辦。崇厚已

派鄧啟元管帶馬步三百餘員名。馳赴薊州東路一帶捕拏。並密派姚懷德訪查窩藏勾結之人。知會各路官兵按捕。此股賊匪倏忽往來。必有窩藏之處。且難保無各州縣蠹役串通消息。即著照崇厚所擬。嚴飭派出各員。知會各路官兵。密速按捕。以遏亂萌。長善連成。徐廷楷均有稽察關口之責。著慄遵前旨。遴派明幹員弁官兵。於要隘各口。嚴加堵禦。並隨時盤詰姦宄。庶免該匪出入自由。長善於山海關教練馬兵。諒已著有成效。本日所請將防守不力之驍騎校等官分別議處。已明降諭旨。照所擬辦理。仍著嚴飭

該員等加意巡防。如敢仍前玩忽。致賊匪任意往來。必將該員等從重治罪。不僅以參處了事。現在賊蹤離關不遠。匪首諒在其中。並著劉長佑長善等密飭派出兵勇一體捕拏務獲毋令遠颺。○六年

諭趙長齡奏嚴禁渡口豫籌防範一摺。山西歸綏等處均與甘肅蒙古接壤。近有回民假扮客商或由蒙古烏蘭察布經過。或由河路至三公旗登岸。寄住包頭。繞赴歸化。購買馬匹軍裝。偽造文書護照。形迹種種可疑。若任聽其往來。姦宄必多。溷迹滋生事端。包頭鎮南海子各渡口。晉省雖有防兵駐紮盤詰。並將船

隻提泊東岸。而迤西百餘里。皆係蒙古四公旗地段。大小渡口。並無防兵。回民多由此過渡。潛赴內地。包頭鎮西通甯夏。商回亦時往時來。隘口紛歧。行人溷雜。均屬可虞。著穆圖善知照現署甯夏將軍。並著裕瑞。桂成一體防範。凡甘蒙毗連晉界。及阿拉善四公旗蒙古地段。沿河一帶渡口。多派兵丁。逐段防守。認真巡查。姦宄不准有船停泊。該處所轄各營地。如有兵民商販。私自賣買馬匹軍裝。均著嚴行禁止。至甯夏與山西貿易往來地界。亦應嚴防姦回溷入。並著穆圖善知照現署甯夏將軍。體察情形。嚴定章程。知

照趙長齡辦理。庶思患豫防。益臻周密。趙長齡仍當飭令馬陞等。將沿河地方。隨時稽查。毋稍大意。

欽定大清會典事例卷六百二十八

兵部

綠營處分例 違禁

違禁○順治初年定朝鮮國人私帶硝磺等違禁之物守關口官撿獲即行報部交與禮部察議若縱令私帶者革職提問失察者革職該管上司降五級調用儻已經撿獲不即報部私帶之人赴部出首後始行報部者守關口官罰俸六月○又定青海蒙古貿易在西甯洪水二處○康熙十一年題准蒙古擅進內地搶掠牲畜

專汎官罰俸一年。兼轄官罰俸六月。有搶掠殺人者。專汎官革職。兼轄官降二級調用。總兵官降二級。提督降一級。皆戴罪圖功。○又議准。青海蒙古在鎮海堡北川二門各委頭目貿易。每次不得過二百人。其因祈禱等事在內地寺廟誦經者。止許百人以內。按數令頭目管轄。百人以外不許進邊。○十二年題准。外國人私行進口。該地方官不察報者。降一級調用。該管上司罰俸一年。○又題准。凡外國人不論蓄髮與否。均不許擅進邊口。違者守邊官弁皆從重治罪。

○二十三年題准。喀爾喀額魯特貢使來京。從各該旗汛地經過者。守汛官即委官二人。兵五名。按次護送。交與張家口官。回時張家口委官一人。兵五名。護送出界。如貢使回時。有在張家口貿易者。事畢守口官速催起身。各汛仍照前按次送出汛地。如無故淹留。將守邊口官議處。若貢使在歸化城貿易。歸化城土默特二旗亦照例委官二人。兵五名。按次遞送出汛。違者議處。○二十八年奏。俄羅斯所據尼布楚。本係茂明安部游牧之所。雅克薩係達呼爾總管倍勒

兒故址本非兩界隙地。其黑龍江、松花江、嫩江、庫爾翰江及烏拉甯古塔、錫伯、科爾沁、索倫、達呼爾、恆滾、牛滿精、奇里江口等處均係鄂倫春、奇勒爾、畢拉爾等人民及赫哲、費雅喀所居。皆屬我地。不可棄之於俄羅斯。又逃人根特本爾等三佐領及續逃之人悉應索還。與之畫疆分界。貿易往來奉

旨。以尼布楚為界。如彼國懇求。可即以額爾古納為界。尋遣官立界牌於格爾弼齊河諸地。用滿漢字及俄羅刺第訥蒙古字。

謹案牌文共七條。一將格爾弼齊河為界。凡山南溪

河屬中國。山北屬俄羅斯。一將流入黑龍江之
額爾古納河為界。南岸屬中國。北岸屬俄羅斯。
其南岸之肩勒爾喀河口。所有俄羅斯所修之
移北岸。一將雅克薩地方。俄羅斯所修之城盡
行除毀。雅克薩所居俄羅斯人民及諸物用盡
行撤往察漢汗。一凡獵戶人等不許越界。違者
拿送該管官懲處。聚來持械捕獵殺人搶掠者。
奏聞正法。一中國所有俄羅斯之人。及俄
羅斯所有中國之人。不必遣還。一切行旅有
准令往來文票者。許其貿易不禁。一會盟之後。
有逃亡者。不許收留。○五十九年議准。哲布尊丹巴呼圖

克圖庫倫地方。俄羅斯與喀爾喀互相貿易。民
人叢聚。難以稽查。嗣後內地民人有往喀爾喀
庫倫貿易者。令該管官出具印文。開明貨物人
數。報理藩院給予執照。出何邊口。令守口官弁

驗照放行。如帶軍器禁物。立即查拏送部治罪。
○雍正二年議准。山海關及奉天吉林等處巡
蹤官兵。除摺獲淺鬚淺末細小歪斜珠子。以及
為數無多者。毋庸給賞外。如一年內摺獲人淺
至二十斤。珠子至四兩者。該管官紀錄一次。巡
查人等共賞銀二十兩。摺獲人淺至四十斤。珠
子至八兩者。該管官紀錄二次。巡查人等共賞
銀四十兩。摺獲人淺至六十斤。珠子至十二兩
者。該管官紀錄三次。巡查人等共賞銀六十兩。
摺獲人淺至八十斤。珠子至十六兩者。該管官

加一級。巡查人等共賞銀八十兩。再有多獲者。照數加賞。移咨戶部給發。如揆查不力。以致私帶過關進口者。該管官降三級調用。巡查人等鞭八十。明知故縱者。該管官革職。巡查人等鞭一百。枷一月。賄縱者計贓。以枉法論。從重治罪。○五年奏准。與俄羅斯分定疆界事宜。除東界額爾古納等處。前經定議。以歸彼國外。今自額爾古納河岸。至阿魯哈當蘇。阿魯奇都勒齊克。太奇蘭等處。並設內地卡倫。應以相對之楚庫河為界。自此以西。沿布爾古特山。以博木沙畢。

彝嶺為界。定界之後。有容納通盜等犯者。互相捕治。復定恰克圖口為貿易所。遣理藩院司官一人管理。貿易人數不得過二百。其京城俄羅斯館。令修整以居使臣。來京讀書幼童及教習等亦令同居。官給養贍。願歸國者聽。○七年覆准張家口獨石口出入人等。令旗員驗票盤查。如有失察私帶違禁之物。責在旗員。營弁免其處分。○九年議准沿邊關隘守關口官。遇有廢鐵貨潛出邊境貨賣者。立即拏究。如徇縱出口者革職。賄縱者革職。提問其鐵鍋農器。准其

前往黑龍江等處貿易。若商民在內地轉相貨賣。守關津兵弁藉端勒索財物者。計贓治罪。○十三年議准。青海蒙古人貿易。不准在洪水鎮海堡等處。令其在丹噶爾設市。每次不得過二百人。或有喜喪煎茶誦經等事。進邊亦不得過百人。令該札薩克呈明辦理。青海蒙古事務大臣查覈。給予印票。守口官弁驗票始准行走。回日繳銷。如蒙古有擅自進口者。該辦理蒙古事務大臣。視其事酌量辦理。報明理藩院查覈。○

乾隆元年

諭向來八旗臺站官兵。於每年二八月間。攜貨物前往中江。與朝鮮貿易。朕思旗人等。但有看守巡查之責。原無販貿易。且亦不諳此事。遠人到邊。恐致稽遲。守候多有未便。嗣後著內地商民。與朝鮮國人貿易。即令中江稅官實力稽查。務須均平交易。毋得勒捐滋擾。以示朕加惠遠人之至意。○七年議准。蒙古進口守關口官兵。查明人數軍器數目。註冊。出口時查對原冊。多帶者不許放出。其喀爾喀額魯特。及各札薩克等。如有新編佐領。初次置買軍器。或將年久破損軍器。修補者。該札薩克開明所

買軍器數目。出具印結。呈送理藩院查覈。如為數過多。或係全副者。具奏請

旨。再令購買。如所買無多。係尋常帶去應用者。咨部給票。該守關官驗明部票放行。若比票內多帶。或與原進口之數目多帶者。報明理藩院議處。其官員民人將軍器賣給蒙古。及守口官兵知情故縱者。皆交刑部治罪。不知情放出者。守關口官革職。該管上司降五級調用。○又議准硝磺。礮。牛角。鋼鐵等物。及各項軍器。不許賣與俄羅斯。額魯特。回子。如有私賣偷出邊口。不行嚴拏。

該管官及兵役知情故縱者。皆交刑部治罪。不知情者。守關口官革職。該管上司降五級調用。

○八年

諭上年九月間暹羅商人運米至閩。朕曾降旨免徵船貨稅銀。聞今歲復帶米來閩貿易。著自本年為始。嗣後凡遇外洋貨船帶米一萬石以上者。著免其船貨稅銀十分之五。帶米五千石以上者。免其十分之三。其米聽照時價公平發糶。若民間米多。不需糶買。即著官為收買。以補常社等倉。或散給沿海各標營兵糧之用。○十四年議准。民人往察哈爾等處貿易。令

多倫諾爾獨石口張家口等處同知驗明人數給以印票並將年貌姓名車數詳載於冊以便回日覈對如有不領票私往者照偷渡關津例治罪。○二十四年

諭向來前往蒙古部落貿易商人由部領給照票稽覈放行。懋遷有無彼此均為便利。近因互市日久不無爭競生事。是以議令禁止。殊不知商販等前往烏里雅蘇台等處亦必由各該部落經過。若中途一切貨物俱令不得通融易換未免因噎廢食。嗣後凡有領票前赴貿易人等所過喀爾喀各旗仍照舊隨便交

易俾內地及各部落商貨流通以裨生業。其一切稽查彈壓地方官及各札薩克留心妥協經理毋任巧詐姦商。逗遛盤踞以滋事端。○二十五年奏准裕拉里克卡倫送到巴勒提貿易人等。係頭目默默斯。杷爾烏蘇完。兩處遣來貿易。稱該部落相隔一河。各有八千餘人。甚屬和好。向來在葉爾羌貿易。今平定回部各城願來歸附。其所攜貨物無多。以初次前來免納稅銀。並酌給口糧。俟貿易事竣護出卡倫。○又

論內地銀兩。攜至外藩交易。有發無收。今舒赫德奏請

將綉緞多為解送。較原價酌增運費。則未免太廉。卽如綉緞亦內地所貴重。行至外藩。自當酌量物情。以定價值。若初次價賤。則姦商回人等私行興販。徒為伊等之利。應隨時籌畫。酌量定價。行之數年。再為平減亦可。惟不得任商販私行攜帶。減價售賣。欽此。遵旨議定。布魯特塔什罕等回人。欲將銀兩前赴哈密貿易。與內地甚有裨益。概照新疆貿易之例。行知該處辦事大臣。善為妥辦。○二十六年

諭哈薩克等由塔爾巴哈台至新設卡倫。甚為徑直。儻與北路商販等貿易。則伊犁烏魯木齊等處。難於得

馬外藩貿易一事。原應官為經理。若聽其與北路商販往來。則新疆難得馬匹。而伊等債負爭鬪之釁。皆從此起。傳諭各駐紮大臣札薩克及卡倫侍衛台吉等。嚴行禁止。該大臣等仍不時巡查。如有私行貿易者。一經查出。即從重治罪。並將侍衛台吉等參奏。

又

諭哈薩克本年自五月貿易後。迄今未來。伊等見小貪利。若概從優渥。則難乎為繼。或過示減省。則遠人疑阻。惟在大臣等悉心籌酌。調劑得宜。更宜加意體察。固不可刻覈以阻歸順之忱。亦不可虛糜以啟覬覦。

之漸。總之內地貨物有餘。而邊境馬匹最要。化無用為有用。莫善於此。但不可因朕此旨。遂不加節制。著傳諭該管大臣。悉心妥協辦理。○二十七年

諭。回部蕩平。內地商民經由驛路及回人村落。彼此相安。臺站回人又疏引河渠。開墾田地。沿途水草豐饒。行旅並無阻滯。若商民不時前來貿易。即可與哈密吐魯番一體辦理。於官兵亦有裨益。但須聽商民自便。不可官為勒派。有願往者。即給以印照。毋使胥吏需索。人自樂於趨赴矣。○又

諭。哈薩克遣使貢馬九匹。所帶馬四百餘匹。已派台吉

等禁止貿易。護送入覲。哈薩克來使。著派出為首者。數人。前往熱河候旨。伊等所帶馬匹頗多。自必乘便貿易。從前禁止哈薩克北路貿易。蓋慮伊等貪程途近便。遂不肯遠至伊犁。但伊犁烏里雅蘇台皆屬內地。如過示區別。亦於體制未協。惟應禁止私市。概從官辦。而稍增物值。減其馬價。伊等惟利可圖。自必專向伊犁。即令其仍貪近便。情願減價。則烏里雅蘇台官庫綴足等物。尚有雍正年間收貯者。與其徒為朽腐。即以易馬。或就近收放。或酌量撥解。亦無不可。應准其一體開市。伊等若謂物價較伊犁有加。亦諭以

蒙古地方價值情形。難與伊犁一例。至卡倫臺站人等私行交易。斷宜嚴禁。○又

諭。哈薩克全部。均為臣僕。其在西邊游牧者。與伊犁烏魯木齊相近。自應在彼貿易。至阿布賚游牧與古爾班察爾相近。在北路貿易為便。伊等情願來烏里雅蘇台。亦無不可。其貿易之處。不必停止。○又

諭。哈薩克向來未至回地貿易。苟非貪圖重利。馬肯前往。現在伊犁等處貿易。上等馬匹。僅估銀價三四兩。而回地則加倍有餘。往來日久。不但伊犁等處貿易大減。亦恐滋生事端。但阿布賚素稱恭順。此次既經

准其貿易。嗣後伊等再來，必禁絕回人私市。但從官買較之伊犁等處價值更減，不可稍令獲利。仍曉以回地無須多購馬匹，其各項牲隻自有拔達克山安集延布魯特等處商販，爾等不必前來。如此則伊等自不肯遠赴。將此傳諭該駐紮將軍大臣等知之。

又

諭嗣後查拏私行賣漫買漫飛漫人等，其查出銀兩，如在一百兩之內，著不必入官，即行分賞原拏人等。如在一百兩以上，作為三分，二分入官，一分賞給原拏人等。永遠為例。○二十八年

諭哈薩克等同布魯特來烏什貿易。恐伊等至特穆爾圖淖爾游牧。昨傳諭該大臣派員前往伊犁。向西吹塔拉斯等處巡查。若有哈薩克布魯特等偷越游牧。即行驅逐。特穆爾圖淖爾亦著一體巡查。○又

諭哈薩克人貪鄙性成。若聽其來往。難免盜竊爭鬪之事。嗣後再有貿易人來。應交察達克圖布慎。諭以內地商人俱在伊犁烏魯木齊。爾等若欲貿易。自可前往。且此間並無管理貿易之員。萬一滋生事端。亦於爾等無益。是以禁止。並將此交軍機大臣於哈薩克人到京時。亦照此明白曉諭知之。○二十九年奏准。

富商巨賈用車船運販糟麴。經過關津隘口。不能查拏者。守口官罰俸三月。○又奏准文武官員出差赴任歸籍。及商民人等出外貿易等事。除鳥槍不許攜帶外。如有攜帶弓箭刀長槍各項軍器。途中防護者。在京由兵部給票。在外由該差遣上司及該管地方官取具印票。將所帶件數於票內註明。以備出城沿途照驗。俟到日將原票繳官。轉送各該處查銷。如無票私帶及票外多帶者。罰俸六月。若隱匿原票一月以外不繳者。罰俸三月。○又奏准雲南省白稅口黑

鉛不許販運出口。如有潛行出口。地方官不行查禁者。照失察廢鐵出口例議處。○又奏准青海蒙古有置買鐵鍋鐵撐鐵杓等器。並耕種所用之犁頭。鞏轡所用之鐵什件。在西甯置買者。將所買數目。報明辦理青海蒙古事務大臣查覈。其為數無多。填明照票。聽其出入。如數多即酌量減除。在丹噶爾口置買者。該處將弁查照數目。准其置買。仍轉報辦理青海事務大臣查覈。至青海蒙古兵丁。如有弓箭等械缺少。應須製造添補者。該札薩克呈報辦理青海蒙古事

務大臣酌定具奏請

旨。五樹等處番人所需鍋犁亦准其置買。其餘鐵器一概禁止。○三十九年奏准外省官員差人置買盔甲等項軍器。用印文投部。方准購買。兵部仍給印文。令守門官驗實放行。如無印票。即係私買。守門官盤獲呈解兵部。轉送刑部議罪。如無印票。將軍器私行放出者。將城門領城門吏門千總各罰俸三月。領催兵丁鞭五十。○四十二年奏准吉林庫爾訥窩集地方。係出漫山場。八旗官兵砍採木植。起程以前。每年照例出派

官兵揀選當差勤慎誠實者。令其前往。仍派能於管轄之協領帶領官兵先行前往江上游口隘等處稽查。此項砍伐木植人等。如有違例於票外多帶人等。並夾帶米糧者。即行查拏加倍從重治罪。○四十三年

諭。據額爾謹等奏拏獲私販玉石之吳芑洲等。撥出玉石。並無官給照票。自係私販。但向無治罪專條。請敕部定擬分別治罪等語。轉可不必如此辦理。自平定回部以來。所產玉石。除將所餘招商變價外。其違禁私賣私買載回內地制器牟利者。並不始於此時。而

邇年來蘇州所製玉器色白而大不一而足非自回疆偷售而何朕久經深悉第以國家幅員廣闊地不愛寶美玉充盈以天地自然之利供小民貿易之常尚屬事所應有故雖知之而不加嚴禁此即取玉於山之意至高樸駐紮回疆敢於明目張膽偷賣官玉價逾鉅萬實出情理之外雖已審明在該處正法尚不足抵其罪愆其案內之商人張鑾鄉約趙鈞瑞膽敢交結大臣夥同其家人沈太李福常水輩偷販覓利情罪可惡自難輕宥至吳芑洲等既訊與趙鈞瑞等不相認識並非高樸案內有名人犯何必與張鑾

等同科。吳芑洲所販之玉。既無官給照票。其為私販無疑。但究非與高樸通同販賣。尚可未減。若將此七人治罪。則前此私販回疆玉石之人。轉得漏網。亦非情法之平。今該犯等所販之玉。俱已查明入官。亦足以蔽辜。毋庸另行治罪。昨陳輝祖奏襄陽盤獲玉商楊添山等十七名。解到時。亦著詳細研鞫。是否與張鑾趙鈞瑞同夥。或不相干涉。訊取確供。分別辦理具奏。其現在或有續獲者。亦照此辦理。此乃朕格外之恩。凡屬商衆。俱當感激改悔。若經此次查辦之後。復有私赴新疆偷買玉石者。一經查獲。即照竊盜滿貫

例計贓不能復邀寬宥矣。○五十二年

諭都蘭哈喇地方與札哈沁游牧相近若聚集多人窳鉛貧民衆多俱係不肖之徒未免滋生事端着嚴行禁止仍不時出派官兵梭查如有偷窳者一經拏獲從重治罪示懲斷不可草率辦理。○五十四年奏准

哈密北山葫蘆溝等四處出產大黃其性甚寒難以合藥現在內地嚴禁大黃惟恐姦民希圖重利不分好否因嘉峪關稽查嚴密在哈密地方偷窳販往新疆各處嗣後飭地方文武官員及坐卡官員照禁止硝磺之例嚴查如兵役不

行詳查。以致偷窆。一經查出。商民從重治罪。兵役責革。地方文武官員。叅奏交部嚴加議處。哈密大臣一併交部議處。奉

諭。哈密葫蘆溝等四處。均出產大黃。雖難以合藥。究與內地相似。姦商民人。知內地嚴禁販賣大黃。偷往此等地方。窆取販賣。假充內地大黃。誑騙回子人等。亦屬不可。著一體禁止。○又奉

旨。瑪納斯所產一項綠色玉石。雖非和闐等處所產白玉。究係綠玉。若不禁止。儻被姦商夾帶。此項玉石。販至內地。亦同白玉。得受重利。理宜一體禁止。如有夾

帶偷販內地者。一經拏獲。即照私帶玉石之例治罪。經過之吐魯番巴里坤哈密大臣亦令嚴察。○又

諭前因恰克圖業經閉關。不准與俄羅斯貿易。而大黃藥料。尤為俄羅斯必需之物。恐商販私行偷漏。節次傳諭新疆駐紮大臣嚴加查禁。並因各省地方。不特廣東濱臨洋面。即盛京江南閩浙直隸山東等處。俱有沿海口岸。諭令各督撫等。飭屬實力稽查。毋許姦商偷販出洋。致轉售與俄羅斯。希圖厚利。復因內地需用大黃療治疾病。不可查辦過當。以致因噎廢食。續經降旨。令該督撫妥協酌辦矣。大黃一種。不特內

地民人用資療疾。即出口地方。如熱河八溝等處。人煙輻輳。亦與內地無異。若查禁過嚴。致商販裹足不前。於民間亦多未便。第各省查禁私販。固不可有意從嚴。亦不可漫無稽察。著該督撫等各就地方情形。妥立給票章程。定以限制斤兩。酌議每處需用大黃若干。發給官票。於經過各關隘時。將票呈驗。如無官票可憑。即係私行販運。查拏治罪。飭令地方官妥為經理。毋任不肖吏胥藉端需索。有票者不禁。無票者即係私販。並通衢僻壤。出示曉諭。以現與俄羅斯不通貿易。是以不准大黃出口。俟將來俄羅斯送出賊

犯後仍可開關通市。則大黃一種原應照常販運。自毋庸給予官票。有累經商。各督撫一面酌議奏聞。即一面徧行出示。不必俟部覆到時始行辦理。免致往返稽遲。有誤閭閻需用。○又

諭大黃藥料為民間療病所必需。前因不准與俄羅斯交通貿易。恐姦商私行偷漏。是以諭令沿海各省督撫飭屬實力稽查。旋經續降諭旨。不可查辦過當。以致因噎廢食。並令各就地方情形。妥立章程。發給官票。以憑查驗。原恐各處海口地方偷販出洋。轉售俄羅斯希圖厚利。必須嚴加查禁。至內地各州縣。本可

任其商販流通。若一概令請官票。始准採買行運。地方官辦理不善。非特胥吏藉端勒索。擾累商人。而各州縣不肖官員。亦難保無從中染指之弊。以致商販裹足。藥材短缺。於民間多有未便。殊非朕惠愛閭閻之意。嗣後大黃一種。止須於各省沿途口岸。及直隸之山海關等關口近邊地方。嚴行飭禁。毋許絲毫偷漏。即陝甘兩省。亦止當於嘉峪關榆林等處。加意查察。其內地省分。如臺灣瓊州崇明等處。地懸海外。仍著各該地方官。酌定限制。給予官票呈驗。以防私販偷漏。其餘各州縣。均聽其照常販運。毋庸給發官票。

以免紛擾而便民用。○嘉慶二年

諭上年商民公我往烏梁海地方貿易。西北兩路內地
民人與外藩交易。俱係彼處人等前來該將軍大臣
所轄地方。方准貿易。烏梁海地方。係在卡倫之外。商
民等私自前往貿易。俱由該將軍大臣等平日不能
留心所致。不可不亟為禁止。將此通諭西北兩路各
城駐紮辦事將軍大臣等。嗣後內地商民。各宜留心
體察。如有應與外藩貿易物件。俟該處人等到後。再
令互相交易。毋得任意越界妄行。永著為令。再有似
此者。必將該將軍大臣從重治罪。○六年奏准出關

之人夾帶違禁貨物。守口官徇縱令其出口者。按其所帶之物。分別治罪。其不由應出之口越渡者。失察之員。罰俸一年。○又奏准。察哈爾歸化城蒙古人等。若將軍器偷賣者。除本身治罪外。失察之該管各官。降三級調用。○九年。奏烏里雅蘇台地方貿易民人。前往喀爾喀四部落各臺站居住之三佐領下。唐努烏梁海等處貿易。俱由將軍衙門領取照票辦理。究係邊界卡倫。僮姦商杜法取利。偷越卡倫。必致滋生事端。嗣後將唐努烏梁海三佐領烏里雅蘇台北邊

九臺站民人貿易之處。永行禁止。奉

旨著照所奏嚴行禁止。其烏梁海人等有買取什物者。於進皮張之便。前往烏里雅蘇台貿易。○又奏准嗣後烏梁海庫倫彼此交易。務用現銀置買物件。商民斷不准借與該處人等銀兩。賒給物件。偷至游牧地方討債。違者從重治罪。○十年

諭蒙古游牧人等負欠民人帳目。即飭分別還清。將欠債者重責示懲。又民人海高岱搶劫蒙古羅卜桑牛隻烏槍等物。蒙古人性質高厚。理應永守舊業。民人圖利。前往游牧開地耕種。故帳與蒙古人。其習甚陋。

致蒙古人大虧生計。是以朕節經諭禁。即如民人海
嵩岱藉討債為名。糾眾毆人。強取物件。甚屬不知法
紀。俟審明後。分別首從。即行按律正法。嗣後止准正
商在彼。其無照姦民。即刻驅逐。酌定章程具奏。欽此。
遵

旨議定。嗣後帳目已完者。令其速回。未完者。展限完結。
方令其歸。以後若再有無照私往者。即行拏送
將軍大臣照例治罪。該札薩克官員容隱不報。
一經查出。一併叅處。十一年

諭據吳熊光等奏查明喀啞國來廣貿易情形一摺。略

啞國即俄羅斯國。向例止准在恰克圖地方通市貿易。本有一定界限。今該國商船駛至粵東。懇請赴關卸貨。自應照例駁回。乃延豐擅准進浦卸貨。實屬冒昧。且該國商船於十月初八十七等日先後進口。延豐於二十九日始行具奏。又於咨商總督後。並不候那彥成回咨。輒以意見相同之語。捏詞入告。其咎甚重。前經降旨將延豐降為七品筆帖式。尚不足以示懲。延豐著即革職。仍令在萬年吉地工程處效力行走。接任監督阿克當阿。因延豐已准該夷商起卸一船貨物。亦即不候那彥成移知。率准後船進浦卸載。

吳熊光孫玉庭未經詳查明確。遽准開船回國。均屬辦理未協。不能無咎。吳熊光孫玉庭阿克當阿均著交部議處。嗣後遇有該國商船來廣貿易者。惟當嚴行駁回。毋得擅准起卸貨物。以昭定制。○十六年奉旨。黃芪為藥植所需。附近貧民零星挖賣。在所不禁。若至聚集多人。並倚眾拒捕。則必應按律治罪。現將偷挖黃芪。明定科條。稽查嚴密。小民自不敢干犯禁令。但近年口外游民衆多。伊等本係無業之徒。趨利若鶩。邊外所產。如鉛斤木植不一而足。設姦民等舍此趨彼。聚集既衆。必仍滋事端。若逐案增定條例。亦屬

繁碎。此事總在沿邊關隘。於無業游民出口時認真查禁。出口之民既少。自不致羣相糾集。牟利逞兇。從前所定守口文武員弁處分較輕。率多視為具文。以致關禁廢弛。著吏兵二部會同覈議。將守口兵弁縱放及失察無票民人出口處分酌改加重。庶該員等自顧考成實力稽查。不致仍前懈玩。欽此。遵

旨議定。凡邊關隘口。令該管官弁嚴行盤查。若民人並無用印文票。及有文票而人數浮多。情節不符。該管文武員弁失察偷渡。一二名者降一級留任。三四名者降一級調用。五名以上降二級調

用十名以上降三級調用。放出私販人口者革職。受賄縱放者革職治罪。若夾帶貨物守口官徇縱放出者。按其所帶之物分別治罪。其有盜犯逃犯偷渡邊口。失察一名者降一級留任。二名者降一級調用。三名以上降二級調用。五名以上降三級調用。十名以上革職。至威遠堡鳳凰城法庫等處邊門邊柵。向來文職武職分別專管兼管。如有失察賄縱等事。係文職專管。吏部將文職照此例議處。係武職專管。將武職照此例議處。其專管官應降級留任者。兼管之員

罰俸一年。專管官應降級調用者。兼管之員降一級留任。專管官應革職者。兼管之員降三級留任。其各處小溝守口官失察者。均分別專管兼管。悉照此例議處。如有聚眾偷窆黃芪。未及十人。並十人以上。囤積黃芪。十斤及五十斤以上。罪應杖枷者。失察之地方文武官。罰俸六月。人數在五十名。囤積黃芪。在一百斤以上。罪應擬徒者。失察之文武官。罰俸一年。○十七年

諭。貢楚克札布覆奏。創窆黃芪章程。所議是。察哈爾牧廠等處游民私窆黃芪。上年甫經議定章程。限以人

數斤數。嚴禁聚眾剽掠。今若又開領票認採之例。姦民趨利若鶩。勢必多方影射。聚眾紛爭。轉致難以稽查。阿勒精阿所奏不可行。著該都統等仍照原議。章程督飭所屬實力查辦。毋得日久生懈。○又奏准苗疆地方。如有外來民人攜帶眷口。夾帶無藉之徒入境為匪者。除兵丁責革外。失察之專管官降一級調用。兼轄官罰俸一年。○又

諭和甯等奏接據朝鮮國義州府尹馳報該國境內有土賊滋擾。當即飛飭鳳凰城城守尉福甯密派官兵於邊門及沿江各卡。巡查防守嚴密堵禦等情。一摺

朝鮮國臣服本朝。最為恭順。今該國有土賊嘯聚。據城劫掠。現經該國將勦捕情形移報。誼難膜視。該國與鳳凰城邊界接壤。僅有一江之隔。該處土賊被勦緊急。或逃竄過江。逸入邊門。和甯等現雖飭令城守尉福甯密派官兵巡查防守。恐福甯一人督辦不能得力。著派祿成前往鳳凰城督率弁兵於邊門及沿江一帶嚴密巡防。如有朝鮮國土賊潛行竄入。其面貌服色易於辨識。立即擒拏訊問大概情形。一面報明將軍具奏。一面將賊匪解至邊界交該國押回。自行辦理。並嚴飭各處邊門守卡官弁毋許容留土賊。

一人。又

諭陽春等奏。接據哲孟雄部長來稟。懇將唐古特莊子賞給一所。俾資居住。並求差派漢番官員。前往分斷界址。經伊等嚴行駁斥。並飭帕克哩營官等。豫為防範。不令偷越等語。所辨甚是。哲孟雄部落並非藏屬。因畏懼廓爾喀侵欺。慮及日後不能保守疆土。稟求在唐古特居住。伊現在尚存日呢杵岡多二處地方。非比失土無歸。輒豫為營窟之計。妄希賞給藏屬莊子。邊外部落甚多。若因強鄰侵逼。俱紛紛效尤乞賞地方。則藏內疆域。豈能徧為容納。至外番犬牙相錯。

各守地界。亦不能差派官員。一一代為清查界址。著傳諭瑚圖禮等。此次哲孟雄部長既經駁斥之後。或仍懷貪鄙。再行瀆稟。並以後邊外各部落。有似此妄生希冀。飾詞稟求者。俱當嚴詞檄諭。絕其妄想。一面嚴飭邊界營官。加意巡防。毋致偷越為要。○二十二

年

諭。長齡奏請飭禁哈密小南路以重巡防一摺。新疆地方經由道路。俱設有墩臺營汛。稽查往來行旅。且沿途更換路照。定制綦嚴。此小南路係後來踰出僻徑。其間三百餘里。並無臺汛。屢經封閉。若復任聽行走。

不特姦商私販。致多偷越。即逃匪潛行。亦無從盤詰。著將由哈密至奇臺之小南路。永遠封閉。如再有商民私由此路行走者。查獲照律治罪。再有新疆大臣奏請復開。或私令商民行走者。亦治以違旨之重罪。決不姑恕。○道光元年

諭文幹等奏哲孟雄部長來藏熬茶。妄求地方人口。嚴行駁斥。遣回。並擬定該部來藏年限一摺。哲孟雄部落在唐古特邊外。從前福康安進勦廓爾喀時。曾檄令該部乘勢進攻。收回被奪之地。該部長觀望不前。及事定之後。屢次妄行祈求。均經駁斥。今來藏熬茶。

又向噶勒丹錫呼圖薩瑪第巴克什稟懇。或賞給帕克哩營官之缺。或將所屬卓木族卓百姓及卓木雅納綽松百姓賞給管理。該部長貪鄙無知。竟敢妄求藏地所屬職官民人。交伊管理。文幹等飭令該喇嘛嚴行駁斥。以絕其妄念。仍酌賞銀物。以示體恤。所辦俱是。該部長向准來藏禮佛。文幹等因其每次來藏。輒多乞請。擬定以或五年或八年來藏一次。以示限制。著即以八年為限。但所定年限。乃杜其非時前來。若屆期不來。亦聽其便。如未至八年。即行斥駁。至邊防理宜嚴密。如該部長稟請來卓木避暑時。自當隨

時批駁江孜守備帕克哩營官等。小心防範。以安邊圉。○三年

諭那彥成等奏請定商民與蒙古貿易章程。並封閉邊外金廠。西甯涼州等處。向來商民攜帶貨物。由西甯辦事大臣衙門給票出口。徑赴蒙古游牧貿易。既不指定地方。去來亦無期限。以致漢姦混雜。並夾帶違禁器物。於邊陲大有關係。惟念蒙古以游牧為業。若將羊客禁絕。誠恐生計日艱。如漫無稽查。又復諸弊叢生。該督等請嚴立章程。明定地界。自應如此覈實辦理。嗣後無論何州縣羊客。與河北蒙古及河南蒙

古番子交易。即以現定地界為限。不許徑赴蒙番游牧處所收買。至甘涼肅州羊客。准由野馬川沿邊一帶行走。先行報明西甯辦事大臣衙門。分別發給大票小票。逐一註明。嚴定期限。由西甯府知會各提鎮。飭知守卡弁兵。據實查驗。毋許浮冒。其蒙古羊隻。每年定以四月至九月。按照指定處所售賣。事竣不准逗遛。以杜弊端。至河南番族。出售羊隻。並飭循貴兩廳。於貿易時。照給票之例辦理。此外甘州之野牛溝。肅州之赤金湖等處。向有漢姦偷挖金砂。現經該督等嚴拏查禁。惟大通縣屬之札馬圖官金廠。該匪徒

等難保不乘閒潛往開採。著即嚴行封閉。所有應納正撒課金二十八兩零。即停其交納。此項人夫糾聚已久。該督等務須妥為安插。毋致流而為匪。儻經理不善。仍有匪徒溷迹偷窺。致生事端。惟該督等是問。

○四年

諭趙慎畛等奏請嚴禁民人私墾生番境內地畝一摺。福建臺灣彰化縣所轄水裏埔裏兩社。係在生番界內。向以堆築土牛為限。民人樵採。例禁侵越。近年以來。該處生番。因不諳耕作。將熟番招入開墾。據該督等查明。該熟番與漢民交契結姻者頗多。恐漢姦私

入。溷雜難稽。或因生番懦弱。逞強欺占。該生番野性未馴。必致爭鬪肇釁。釀成巨案。不可不嚴行飭禁。現在農事已畢。著即飭令各社屯弁及通土等。查明越入各熟番。概行召回。不准逗遛在內。以後亦不許再有潛往。如敢抗違。該廳縣等立即會營拏究。並著於集集鋪內木柵二處隘口。設立專汛。即飭北路協副將於彰化營內。就近移撥弁兵。實力防堵。毋許番民擅自出入。鹿港同知彰化縣。每年分上下兩班輪往巡查一次。仍按月取具汛弁及屯弁通土等切結。由廳縣加結通報。並責成臺灣鎮會同該道府。嚴行查

察該弁兵如有疏懈徇縱情弊。即行分別斥革治罪。儻該廳縣視為具文。督查不力。亦即據實叅奏。交部議處。該處開墾一事。嗣後不必開端。永當禁止。該督等務飭屬認真稽查。毋得日久生懈。以靖地方。○六年

諭。高溥奏請善辦苗疆保甲一摺。黔省漢苗雜處。近來客民漸多。非土司所能約束。自應編入保甲。以便稽查。除苗多之處。仍照舊例停止外。其現居寨內客民。無論戶口田土多寡。俱著一律詳細編查。惟令各該管地方官查辦。轉致胥役滋擾。據該撫奏稱。現署永

安協副將撫標中軍參將李可仁。誠實明練。能通苗語。黎平府知府杜友李。在黔年久。熟悉苗疆情形。即著該二員會同查辦。將客民戶口田產造冊通報。由地方官隨時稽覈。儻再有勾引流民。擅入苗寨。續增戶口。及盤剝準折等事。立時驅逐。田產給還苗人。追價入官。仍照例加倍治罪。若地方官徇庇不究。並縱令差役擅入苗寨滋事。即行嚴參懲辦。至該參將等俱係現任。既經委辦清查。地方遼闊。不必限以時日。其缺著揀員接署。並令委帶員弁。隨同幫辦。所需飯食夫馬等項。不許派累地方。由藩庫籌項發給。該撫

務飭該員弁等盡心妥辦。綏靖苗疆。○二十年

諭。固慶奏俄羅斯夷人越入卡倫。妥為勸諭。令其歸國等語。此次俄羅斯夷人達噶瑪勒薩滿等。所屬男婦大小一百二十餘人。越入科布多卡倫。聲稱伊國差重。法嚴。逃出偷生。該大臣等曉諭盟長等。令其折回本國。所見甚是。外夷逃入卡倫。斷不可因其懇乞收留。願作僕役。遂爾私容潛住。惟該夷等被難偷生。一味嚴行驅逐。或致激成事端。現已逃入巴里坤界內。著阿精阿妥為辦理。如折回科布多。即著固慶等照依此次辦理章程。派員護送出卡。令其歸國。並諭知

該管官妥為安置。各歸游牧。僕由巴里坤潛入哈密古城烏魯木齊庫爾喀喇烏蘇伊犁等處。即著該將軍都統大臣等一體曉諭。令其歸國。固不許私留潛住。亦不可強逐滋事。並著庫倫辦事大臣轉飭該國嚴禁伊等西路一帶卡倫。毋任夷人出外滋擾。○咸

豐九年

諭樂斌奏土爾扈特汗喀屯鄂斯庫吉爾噶勒。因伊孫年幼孤單。差員稟請延接喇嘛教經延壽等語。喀喇沙爾游牧之土爾扈特部落。久隸藩服。素稱恭順。著照所請。所有現回洮州卓尼寺已革諾們罕阿旺札

木巴勒楚勒齊木著准其前赴土爾扈特教習經典。並著伊犁將軍喀喇沙爾辦事大臣隨時稽查。不准出外滋事。俟教習三年後仍行解回內地。飭交該原籍地方官管束。毋任逗遛。○同治七年

諭。據都興阿奏稱。近來游民續行出邊占地者。絡繹不絕。若不趕緊查辦。勢必愈聚愈多。何所底止。著都興阿恩錫會同揀派委員於春融後先往渾江迤西覆加查勘。將各該處游民戶口及荒熟地畝詳細查明。酌覈情形。妥籌辦理。務期經久無弊。方為妥善。其賸江一帶地方游民尤多。且有伐木山匪溷迹其間。出

沒無常。雖一時未能處置。然亦豈可聽其自然。致滋他患。都興阿等務當先行訪查。明確熟籌辦法。一俟渾江西岸辦理就緒。即可次第查勘也。